

## Premie Sapit

Paul pann bes lebra memsi so lakaz an tol ti kase. Enn lanwit linn trap so fam ek so de garson. Enn par enn, tol pe ale. Zanford ti pe plore for for, mama pa pe fini fer lapriyer. Paul ki ti pe grins so ledan ek aster li dir:

— Bondie inn les nou tonbe, sinon, nou pa ti pou soufer.

— Sa fwa-la, li enn kout tro. Nou vwazin finn depay nou. Anplis, sa misie Cruobally-la pa le donn mwa de semenn lapey. Mo travay kouma enn bef pou li...ek mo pe ale...

— Gate, bann zanford pe fin. Mo bizin lafarinn pou fer dipin, enn tigit diri pou aswar, ek pena ni delwil ni savon pou lav tou bann...

— Ferm to labous ek fer to bann piti res trankil, mo pe panse la.

— Be, gate, zot pann manze depi yer gramatin, ek selman zot inn manz zis de ti patat ki...

— E, ferme do. Mwasi mo pe krev de fin. Ek twa ziska ler to pankor manze. Depi trwa semenn to pe manz lerb kouma kabri. Dan de mwa to pou gagn piti, me pa paret mem ki to ansint. Mo pena enn sou, ek sa sovaz Cruobally-la pe tarde pou pey mwa. Mo pe al montre li kouma nou tret dimounn ki ras nou bouse manze...

— Gard to kalm gate. Pa kas to latet. Mo ena enn sinkant sou ki mo ti kasiet pou letan dir. Mo pou donn twa li pou to al laboutik pou aste...

— Be kouma pou fer sa? Pies to ti kasiet deryer foto maryaz-la, inn gagn trwa zour, monn fini pran li.

— Ein, akoz samem avan yer to ti gran soule ek to ti pe santi loder pi sigaret.

— Wah, samemsa. Mo kone, mo enn gran ipokrit, enn ninport.

— Ayo bondie, tonn fer sa? Tiabon bondie eskiz twa, parski monn plin ar twa. Kouma tonn kapav fer enn kouyonade parey. Depi de semenn nou de garson pe al lekol vant vid ek zot pe bizin dimann sarite ek marsan pou gagn manze. Mo panse ki Zerar pe konkin dipin preske toulezour, akoz Zeremi inn dir mwa sa. Laz nef-an li pe bizin kokin manze tou. Ek gete ki kalite lexanp li pe donn so ti frer set- an.

— Ayo, ase ar mwa do, mo mari plin.

— Paul, mo gate, mo nepli kapav aster. Mo lespri nepli travay. Kapav Bondie pe fer nou pey nou bann pese.

— Ki bann pese nounn fer koumsa. Nou sel fot se nou rint nou kadav lanwit lizour, dan labou, dan lapli, dan soley diplon pou enn ti kas pou sa bourzwa ris ek grannwar-la. Limem nou bondie, ki pe kraz nou, ki pe tret nou kouma esklav.

— Paul, aret kontray Bondie.

— Ase aster. Mo pe al rod mo kas kot Misie Cruobally. Ek sa fwa-la, li pou pey mwa seki li dwa. Midi, mo pou amenn komision pou lasemenn ek to ava kasiet kas ki pou reste kot to anvi.

— Ta ey Paul, kot to pe ale koumsa ?

— To kone Kiran, depi tipti mo pann les dimounn kouyonn mwa. Selman mo touzour per si mo perdi mo travay kan mo al dimann li mo kas. Akoz samem mo res trankil. Sa boug-la, li konn nou lamizer. Samem li profit lor nou. Tou bann travayer inn tom lor so lipie, me be, pa mwa.

— Paul, to mari fier.

— To kone Kiran, inn gagn de semenn, monn kriye, monn dir ki esklavaz ankor existe dan sertenn plas. Akoz samem li pa pardonn mwa.

— Ekout sa Paul, to bizin gard to kalm.

— Monn perdi mo papa kan mo ti ena douz-an. Li ti pe montre mwa boukou kiksoz. Dan tou seki li dir mwa pli inportan se to dignite. Nou dignite sel kiksoz ki fer nou, bann pov, siperyer ki bann zanim. Touletan, mo papa ti insiste lor la. Mo pa kapav aret pans sa apre enn zourne difisil dan karo. Mo arete alor inpe tro lontan avek mo bann kamarad dan kwin laboutik. Apre mo sinkiem topet, la li vinn difisil pou al lakaz. Parfwa, lalkol rann mwa fou, alor mo tir mo laraz lor mo fam ek mo zanfan.